



PERUTUSAN MAAL HIJRAH 1442H
YAA KETUA HAKIM SYARIE

لَهُ مُعَقَّبَاتٌ مِّنْ بَيْنِ يَدَيْهِ وَمِنْ خَلْفِهِ يَحْفَظُونَهُ، مِّنْ أَمْرِ اللَّهِ إِنَّ اللَّهَ لَا يُغَيِّرُ مَا
يَقُومُ حَتَّى يُغَيِّرُوا مَا بِأَنْفُسِهِمْ وَإِذَا أَرَادَ اللَّهُ بِقَوْمٍ سُوءًا فَلَا مَرَدَّ لَهُ، وَمَا لَهُمْ مِنْ
دُونِهِ مِنْ وَّالٍ ﴿١١﴾

"Bagi tiap-tiap seorang ada malaikat penjaganya silih berganti dari hadapannya dan dari belakangnya, yang mengawas dan menjaganya (dari sesuatu bahaya) dengan perintah Allah. Sesungguhnya Allah tidak mengubah apa yang ada pada sesuatu kaum sehingga mereka mengubah apa yang ada pada diri mereka sendiri. Dan apabila Allah menghendaki untuk menimpakan kepada sesuatu kaum bala bencana (disebabkan kesalahan mereka sendiri), maka tiada sesiapaupun yang dapat menolak atau menahan apa yang ditetapkanNya itu, dan tidak ada sesiapaupun yang dapat menolong dan melindungi mereka selain daripadaNya".

Alhamdulillah, syukur kita kepada Allah SWT dengan limpah kurnia dan izinNya, dapat kita bersama-sama sekali lagi menyambut tahun baharu Hijrah. Bersempena dengan ketibaan tahun baharu 1442 Hijrah ini saya mengambil kesempatan mengucapkan selamat menyambut tahun baharu kepada seluruh warga JAKESS.

Bertepatan dengan tema "Ummah Rabbani Negara Harmoni", saya ingin menyeru kepada seluruh warga JAKESS agar berusaha menjadi hambaNya yang taat dan berilmu serta seimbang dalam mengejar tuntutan dunia dan akhirat.

Jadikanlah tahun penghijrahan baharu ini sebagai titik permulaan kita untuk berubah dan mengikat janji untuk menjadi seorang yang lebih baik dari tahun sebelumnya. Pengalaman dan kesilapan lalu usah diulangi sebaliknya jadikan sebagai pedoman dan tauladan. Jika diteliti, kisah perjuangan dan penghijrahan Rasulullah s.a.w. dalam episod hijrah Baginda banyak mengajar kita konsep ikhtiar, sabar, tidak putus asa dan sentiasa berserah kepada Allah SWT.

Sekiranya kita tidak berazam untuk koreksi atau refleksi diri kita untuk menjadi yang lebih baik, kita bakal gagal untuk fokus dan sekali gus menjadikan kita jauh menyimpang dari tujuan asal kehidupan. Oleh itu, kita perlu melakukan muraqabah dan muhasabah diri untuk melalui tahun baharu, agar segala kelalaian, kegagalan dan indeks prestasi utama (KPI) yang tidak tercapai, boleh ditambah baik.

Dengan itu saya ingin mengajak diri saya dan tuan puan untuk terus mengubah sikap dan memperbaharui azam dengan semangat maju ke hadapan bertepatan dengan hikmah hijrah sebenar bagi memastikan jabatan ini terus menjadi antara jabatan kehakiman syariah yang terunggul. Inshaa Allah.

Dato' Mohammad Adib bin Husain
Ketua Hakim Syarie Selangor